



Diskurso Minister di Enseñansa, Siensia, Kultura i Deporte, pa Dia di Enseñansa, Promé di desèmber 2020

Bon dia tur invitadó,
Bon dia tur hende ku ta skucha i mira nos,
Bon dia tur maestro,

Ta un honor di por di por t'aki pa deseá boso un Felis Dia di Enseñansa. Manera ta konosí, ayera mainta mi a huramentá komo minister. Mi ta hopi konsiente ku e reto nobo ku mi a aseptá, ta unu grandi i difísil. Despues di 16 aña trahando den sektor privá, m'a disidí ku ami no ta keda pará na banda mas i kritiká. Mi a skohe pa drenta arena públiko-polítiko pa sirbi mi país.


Mi sa ku mi no ta bini di sektor di enseñansa, pero mi ta un hende ku ta pone kos kana si. Mi no ta un hende ku ta gusta papia i keda papia. Pesei ku mi eksperensia amplio pa pone kos kana, tuma desishon, mi forma di traha pa trese hende huntu, mi background finansiero ekonómiko, mi entusiasmo, mi ta sigur ku huntu ku boso tur ku tin amor pa nos muchanan, mi por logra pone algun trayekto kana den e 4 lunanan mi dilanti. I asina yuda subi kalidat di nos enseñansa.

Nos tur sa ku Kòrsou ta pasando den tempunan difísil pa motibu di e virus Covid-19. E konsekuensianan negativo pa nos enseñansa ta grandi, prinsipalmente serka esnan mas vulnerabel. P'esei mi ta hopi kontentu ku e tema di e dia akí, ta "Bienestar den tempu di Covid". Mi sa ku tin hopi stress den nos skolnan ku e situashon aki. Mi tin hopi apresio pa tur lokual nos maestronan ta hasi tur dia bou di e sirkunstansianan difísil aki. Ta HUNTU nos mester hala mara pa traha na bienestar di e alumno i e maestro.

Pami ta importante pa e maestro por hasi su trabou den un ambiente trankil, safe i agradabel. P'esei mes un di e promé kosnan ku lo mi bai hasi, ta focus riba e ambiente na skol, pa esei ta agradabel, moderno i safe, na òrdu, bunita di fèrf, pa stimulá siñamentu di nos muchanan. Un luga atraktivo ku ta duna e maestro smak pa duna lès i duna e alumno smak pa siña.

Un otro punto ku pami ta hopi importante ta pa siña nos muchanan fo'i chikí kiko ta nos norma i balornan i siña nan disiplina. Esakinan mester haña muchu mas atenshon den nos enseñansa. Mester siña nos muchanan fo'i chikí trata otro ku rèspèt, traha huntu, pa nan ta íntegro, honesto semper sinsero. Siña nos muchanan fo'i chikí lanta mainta i tuma responsabilidat pa lokual nan ke logra e dia ei. Ta kosnan ku nos tur sa ku a bai hopi patras.





Pesei mes mi ke pidi boso tur, pa laga nos ban praktiká mas i mas “Teach Them Young”. Ban siña nos muchana fo’i chikí pa nan hasi deporte, pa nan siña kome salú, usa un tablet òf kòmputer pero usé den un forma korekto, siña gusta siensia, siña traha i hunga ku robòt, siña nos kultura i siña mas idioma posibel.

Tur esaki lo mi bai traha duru ariba pa logra e meta, esta subi kalidat di nos enseñansa. Pa logra esaki, ta masha importante pa nos apresiá nos maestronan, pa nan por tin tur e medionan nesesarario pa nan por duna nos yunan e edukashon, e formashon i e preparashon ku nos tur ta deseá.

Mi sa ku tur esaki ta kosta sèn, mi ta bon konsiente di esei, prinsipalmente ku mi background finansiero ekonómiko. P’esei mes mi ta dispuesto pa traha huntu ku Hulanda, pa asina nos yega na e fondonan nesesarario pa yuda nos maestronan i nos muchanan. Mi sa tambe ku tin algun proseso andando riba e tereno di posishon hurídiko di nos maestronan. Esei tambe lo bai tin tur mi atenshon. P’esei pa e siman aki mes mi ta kuminsá sinta ku tantu e direktivanan di skol komo e representantenan di nos maestronan pa nos ban traha huntu riba e diferente problemannan den nos enseñansa i pone kosnan kana.

Mi ke deseá boso tur un felis Dia di Enseñansa. Maske kon difisil situashon ta na e momento akí, nos lo sa di sali HUNTU padilanti. Boso por konta riba mi dedikashon pa 200%.

Danki sinseramente na tur maestro pa e bon trabou ku boso ta hasi kada dia di nobo. Alabes un danki na tur esnan ku a hasi e selebrashon di awe posibel.

--

Steven Croes

Minister di Enseñansa, Siensia, Kultura i Deporte

